

Paulo Ena Marere Ibaruana

KORINTO

Haukia Herekiai

Puka Aona Irerena 'Abina

Korinto aiaranai ba'ioi haukia bai'oikia ekia 'abi ki'a obokia Paulo herenai tehina hanona a'ikakauma haukia ekia a'ikakauma tea'i ki'ana. Hoahoa neianai hanona Paulo ena raona raona ia ahakiai hanona eapa'ua ki'a baha. Ena nuatae hanona 'abi 'ao ba'ioi bai'oina neiana Korinto haukia herekiai kebaberon, weiana paunai marere neiana ererena, ia kipokia kateonamo haeamo mue.

Puka neiana paipana kori'uaina aonai Paulo ehore 'abi pahihikia tohokia baika ehina pounakia 'abi weikua Korinto maearimakia ebeni 'uainakia haukia. Paulo enuatae ia hanona ua a'i ke'abi aiho, iamo ekia apa, baro'e ai mai ia teiha 'ama'amana paunai 'abi pahihikia tohokiai ehina benakia. Korinto haukia 'abi neiakia aiana kateo'o ba katebatohanakia mai ekia hoahoai kateraona kabe hanona aonamo kerama.

Rani weianai abomo a'ikakauma haukia Iudeai hanona ekia mauri teki'a. Ua buonai Paulo baraibarai monikia baika ebararonakia, keaoainakia kebenakia. Weiana buonai Korinto haukia aokia niba taburanakia, aka neiana paunai moni baika katebaibeni (8–9).

Puka orenai hanona Paulo e'abi, ba'ioi haukia bai'oikia baika teao tibaki'ana. Ena nuatae apa'uana hanona Korinto haukia ba'ioi bai'oikia weiakia aiakia a'i kateo'o.

Puka Paipana Apa'uakia

- a. Roba iahu. (1.1-11)
 - b. Paulo mai Tirama ena marea haukia Korintoai. (1.12–7.16)
 - c. Beruberu tabakia a'ikakauma haukia Iudeai 'eukia. (8.1–9.15)
 - d. Paulo iuhubeau hauna ena hiabu. (10.1–13.10)
 - e. 'Abi orekia. (13.11-14)
-

Banamo 'Abina.

1 ¹Au Paulo Keriso Iesu ena iuhubeau hau'u Tirama ena nuatae paunai, mai a'ikakaumai uaho'abaka Timoteo ohi marere neiana tarerena niwahi Tirama ena marea haumi Korinto aiaranai tomiaho abomo Tirama ena maearima ikoimiai Akaia hanona maikoina aonai tomiaho haumi heremiai. ²Tabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua hanona ahamiai kemiaho.

Tirama Hanona Ao Bakiro Ikoinei Pokina.

³Tirama kahabanamona aika eka Obiapaka Iesu Keriso hamana. Ia hanona aoko'o mai ao bakiro ikoinei pokina Tiramana. ⁴Emai aro'ari ikoikia ia ehore aomai ebakironakia, weiana buonai Tirama aomai ebakironakia ihobonai bariu tiaro'ari haukia aokia katabakirona abomo ketaina. ⁵Pokina Keriso ehau haiara ihobonai ai abomo rani bo'ona tahau haiara, ba rani bo'ona ao bakiro 'eumaiai niapa'ua Keriso paunai. ⁶Ai katahau haiara hanona wai aomi ibakirona mai ibamaurimi paunai, ai aomai kebakirona wai aomi abomo kebakirona, pokina ao bakiro weianai tabura katoa'ina haiara weiakia herekiai katokori 'ini ai hau haiara aokia takori 'ini 'abana. ⁷Emai buabeni heremiai hauna ekori 'ini, pokina ai ta'ioibina kipokia nahahau haiara ihobonai ai mai wai kipokia aoka kebakironakia.

⁸Uaho'abamai e, ai tanuatae Asia hanonai taro'ari haukia kato 'ioibinakia. Ai hau haiara tahoainakia hanona teapa'ua ki'a baha abomo tepuma ki'a baha, ai katamauri hauna a'i tabuabeni 'apuana. ⁹Ai kipomai aomaiai taonobaina hanona aba kata'ari. Ia neiana erama hanona ai kipomai haumaiai a'i kata'ikakauma paunai, 'a 'ariai nibamikiri muenakia Tiramana ikupaianamo kata a'ikakaumana paunai. ¹⁰Ia ehore 'ari ki'a obona herenai ebamaurinamai abomo kebamaurinamai. Haeamona ia tabuabena kebamauri muenamai. ¹¹Wai abomo katobarainamai emi bahuba'ari ai. Ba bahuba'ari bo'okia weiakia paukia Tirama keba namonamai, weiana maearima bo'okia katehore namo 'abikia Tirama katebena ai paumaiai.

Paulo Ena Raona Eba'oruna Hauna Ebahaeaina.

¹²Emai apa hanona neiana aomai tohanai tabatohana, emai mauri hanopakai abomo emai baihatia'a wai kipokia hanona mai robena mai berona Tirama 'eunai. Ai neiana tababaina hanona hanopaka ena aobero ai aha'i, ia Tirama ena aoko'o hoana hiabunai. ¹³Ai wai katotuabina mai obona katobo hauna mo tarere benimi, nanuatae maikoina kato'iobi haraina. ¹⁴Wai bariu obomai a'i tuobo harai re'a au nanuatae wai ai

kato'iobi harainamai, weiana eka Obiapaka Iesu Keriso ena mai raninai ai wai ʔapainimi ihobonai wai ai katoapainamai.

¹⁵Au neiana a'iobi haraina paunai, weiana e'u raona abakorina kawahi 'uai heremi banamo ibaruana katoa'ina. ¹⁶E'u raona aba'oruna hanona kawahi heremi ba kaeao Makedonia, haeamona Makedoniai kamue hanona kamai heremi, ba wai katohore katobaraina'u kaeao Iudea. ¹⁷Wai turaonana e'u raona weiana aba'oruna raninai 'ama'amanai abakorina, u? 'Ao hanopaka raonaraonana ababaina ba rani hamonai 'e mai aha'i ahinana, u? Aha'i 'akina. ¹⁸Tirama hanona aia ibabua 'auna hauna, ihobonai emai 'abi ewahi heremi hauna hanona rani hamonai 'e' mai 'aha'i' a'i tahinana. ¹⁹Sila,^a Timoteo mai au wai baiatamiai tairoro aina hauna Tirama Nahuna Iesu Keriso hanona rani hamonai 'e' mai 'aha'i' a'i ehinana, ia aonai hanona rani ikoinai 'abi tohana 'e' mo nemiaho. ²⁰Pokina Keriso hanona Tirama ena 'abi'uai ikoikia eba tohanakia. Weiana buonai Iesu Keriso paunai 'Amen' nahahinana Tirama atana kahabanamona. ²¹Wai mai ai kipokia Keriso aonai ebakori 'ininaka hauna hanona Tirama. Ia ehore ebahiabunaka. ²²Ia ena hoa haukai ehore 'auna aika hanona ia 'euna abomo ena Auba Robe aokai ehorotina weiana hanona keba maurinaka hoana.

²³Au Tirama atanai na'abi abomo ia ao'u e'jobina, a'i marobenimi aomi a'i mabahaiarana buonai a'i awahi Korinto. ²⁴Ai wai emi a'ikakauma a'i katapoki aina pokina emi a'ikakauma etabura, ia ai hanona wai kipokia nahaka haeamo aomi ibanamona paunai.

2 ¹E'u raona abakorina hanona a'i kawahi heremi aomi a'i mehaiara taearanai. ²Pokina au wai aomi kabahaiarana hanona tai kehore au kebaonamona'u? Ia wai mo naiami aomi aba abahaiarana haumi. ³Weiana paunai marere naiana arerena, au kawahi raninai wai au katobaonamona'u haumi aomi a'i mabahaiarana marikina. Pokina au a'iobi haraina au kaonamo hanona wai ikoimiai abomo katoaonamo. ⁴Arere benimi raninai ao'u ehaiara abomo epuma maha'u mai beina, weiana hanona aomi kabahaiarana paunai aha'i ia kaba'iobinimi au wai naraona'au ainimi.

Heremiai Beho Tebabai Haukia Ekia Beho Katohina Hao.

⁵Hau ha ehore 'abana aona ebahaiarana hanona au ao'u mo a'i ebahaiarana ia wai ikoimiai aomi ebahaiara 'apuana. Au a'i ka'abi pahihiki'a baha ia herenai. ⁶Hau weiana ena ki'a 'arana wai bo'omi tohore puma tobena hanona aba etaina. ⁷Bariu hanona ena ki'a katohina hao abomo aona katobataburana, aona a'i mebahaiara ki'a bahana ta'una. ⁸Ua buonai au wai nanoinimi, wai ia turaona'auai tohana hoana

^a 1.19 'ao *Silvano*

katobaihana. ⁹Marere weiana arere benimi ena poki tohana hanona au ka'jobina aia'u tuka'ai tohana rani ikoinai, 'ao aha'i. ¹⁰Wai hau ha ena ki'a katohina hao hanona au abomo ena ki'a kahina hao. Au—ia kahina hao paunai—ena ki'a ahina hao weiana hanona Keriso wairanai ababaina wai paumiai. ¹¹Weiana hanona Satani kehore a'i me'oinaka marikina, pokina aika hanona ena baihobo akakia aba ha'jobinakia.

Paulo Ena Nuatae Tito Keihana.

¹²Au aeao Toroa airana Keriso ena pou namona kairoro aina aonai taeara ikaikau au weia Obiapaka ena aka kababaina. ¹³Ia ao'u hanona a'i enamo pokina uaho'abaka Tito weia a'i atabu ahina, haparua ahinana maearima weia haukia herekiai ba aeao Makedonia.

Aika Hanona Timi Namona Keriso Herenai Nimai.

¹⁴Iamo Tirama namo 'abina nabena pokina Keriso nihore rani ikoinai ne'uai ainamai ena mauri taburana aonai katamiahao, ai Keriso pouna namona katairoro aina kate'jobina 'eka maikoinai matoha timi namona nirama otaraina 'abana. ¹⁵Ai hanona timi ha 'abana Tirama wairanai Keriso herenai nimai weiakia timauri mai ti'akauma haukia baiatakiai. ¹⁶Weiakia ti'akauma haukia herekiai ai hanona timi ki'a obona 'ari kemaiaina, weiakia timauri haukia herekiai ai hanona timi namona mauri kemaiaina. Tai etaina aka neiana kebabaina? ¹⁷Ai hanona bo'okia 'abakia aha'i, ia hanona Tirama ena 'abi kawakawa tabanai tibaona, 'a ai hanona 'abi tohana tairoro aina mai aomai tohanai Tirama wairanai mai Keriso aonai ihobona Tirama euhunakia haukia 'abana.

'Abi'uai Mahamahana Ena Aka Haukia.

3 ¹Turaonana ai kipomai tapani muenamai, u? 'Ao baikia tibabaina 'abana, baikia herekiai ai ibanamomai marerekia katanuatae ainakia kata'i katawahi heremi, 'ao wai heremiai ibanamomai marerekia kata'i kataeao baikia herekia? Aha'i 'akina. ²Wai hanona ai emai marere, aomaiai tererena maearima ikoikiai te'jobina abomo tetuabina. ³Ewaira tina harai wai hanona Keriso ena marere, ai tamaiaina, umu ai a'i ererena ia mauri Tiramana ena Auba Robeai ererena, pihara ahanai a'i ererena ia maearima aonai ererena.

⁴Ai na tapani aihoko pokina Tirama wairanai weiana tabatohana Keriso paunai. ⁵Ai hanona a'i ta'abi kipomai emai taburai aka neiana tababaina, 'a tabura weiana hanona Tirama herenai nimai. ⁶Tirama ehore 'abi'uai apa'uana mahamahana akana katababaina haukia ebaonamai, 'abi'uai mahamahana neiana hanona rauhubu pukanai tererena hauna aha'i ia Auba Robe 'euna. Rauhubu irere hauna hanona 'ari kemaiaina ia Auba Robe hanona mauri kebenaka.

⁷Rauhuhu pihara ahanai ererenakia ba Mose ebena raninai Tirama ena nuabi ewaira tina Mose wairanai ea, ea ki'a baha buonai Isaraela haukia a'i teiha 'ariai 'ariaina, ba rani a'i ehoma'a ea weiana mahari mahari e'akauma. Rauhuhu weiana 'ari nimaiaina hauna nuabi uahomana aonai emai raninai, ⁸Auba Robe ena aka weiana mauri nimaiaina hauna nuabina hanona aea keapa'ua aiho! ⁹Maearima beho 'ekakiai kehorotina akana enuabi raninai maearima bero kebenakia akana nuabina hanona aea keapa'ua aiho! ¹⁰Nuabi 'uaina hauna enuabi, iamo nuabi apa'uana mahamahana emai hauna paunai nuabi weiana hanona matoha a'i enuabi. ¹¹Taba emiaho 'apua hauna mai nuabina raninai, kemiaho banaibanai tabana nuabina hanona aea keapa'ua aiho!

¹²Emai buabeni neiana paunai ta'abi tabura. ¹³Mose hanona mukoai wairana e'aeana pokina Isaraela haukia ea weiana ni'akauma hauna a'i temeihana paunai. Ai hanona aka uahomana a'i tababaina. ¹⁴Aokia hanona tekaiabu toha abomo bariu rani neianai rauhuhu 'ai'aina pukana tetuabina aonai ia aokia hanona muko hamona weianai tekaiabunakia. Hau ha Keriso ena mauri aonai ketoto hanona muko weiana kekapare. ¹⁵Bariu rani neianai abomo Mose ena rauhuhu katetuabina raninai, muko hanona aokia nikaiabu ohona mo. ¹⁶Ia hau ha keao Obiapaka herena raninai, muko ia herenai hauna aba ia'i obo. ¹⁷Obiapaka hanona Auba, ba Obiapaka Aubana ae'eai hanona aika rauhuhu herenai ha'abaea. ¹⁸Aika ikoikai wairakai muko keirubu Obiapaka ena nuabi kahabawaira tinana matoha oreore 'abana, ba aokai Obiapaka Aubana niaka hanona aika ia ihobo ihobonai nahaeao nuabi niapa'ua hao apa'ua hao hauna aonai. Obiapaka hanona Auba, ia nihore aka neiana nibabaina.

Kepu Namona Puou Aonai 'Abana.

4 ¹Tirama ena aoko'o ai aka neiana ebenamai tababaina, ua buonai ai aomai a'i ni'abe'abe. ²Ai bunianai haumaea akakia tababai haukia aba tane'e, ai bai'oi akakia a'i tababai abomo Tirama ena 'abi a'i tahina haeaina. Ia 'abi tohana tahina karahi haraina, weianai maearima aokia tohanai kate'iohina ai maearima aea homamai Tirama wairanai. ³Ia pou namona ta'ororo aina hauna maearima herekiai ebuni raninai, pa'e weiakia mo kate'ari haukia herekiai ebuni. ⁴Satani hanopaka neiana tiramana nihore a'i tia'ikakauma haukia aokia nikaiabunakia paunai, pou namona eana weiana Keriso ena nuabiai nibawaira tinana hauna a'i teiha tinana. Keriso hanona Tirama ihobo ihobona hauna.

⁵Ai kipomai poumai a'i ta'ororo aina, ia ai ta'ororo ta'abi Iesu Keriso hanona Obiapaka, abomo ai hanona emi ta'ara'i haumai Iesu paunai. ⁶Tirama e'abi etibaha, "Wapura aonai ea merama." Ba Tirama weiana ehore ena eai ai aomai ebaeana, Tirama ena nuabi Keriso wairanai ewaira tina hauna obona taobo mai taihana.

⁷Ai hanona puou 'abana, aomai kepu namona neiana nemiaho, weiana nihore nibaihanakia hiabu apa'uana hanona Tirama herenai nimai, ia ai heremai ai a'i nimai. ⁸Taeara bo'okia haeai haeai ai tibattetuanamai iamo a'i ta'eho, taba bo'okia aomai tibaro'arinakia iamo aomai a'i ni'abe'abe. ⁹Bo'okia ti'oatanamai iamo Tirama ai a'i ehabonamai, rani bo'okia tiahunamai tiba'ehonamai iamo a'i taki'a. ¹⁰Nahomanai rani ikoinai hauanimaiai Iesu ena 'ari tabuana, weiana hanona Iesu ena mauri ai hauanimaiai nemiaho hauna kewaira tina paunai. ¹¹Ai tamiaho emai mauri aonai rani ikoinai Iesu paunai 'ari tawairana, weiana hanona ai hauanimaiai neiana ke'ari hauna aonai Iesu ena mauri kewaira tina. ¹²Weiana paunai 'ari hanona ai aomaiai niaka, ia mauri hanona wai aomiaiai niaka.

¹³Puka robenai na erere aihona, "Au a'ikakauma paunai, a'abi." A'ikakauma hoana hamona weianai, ai abomo ta'ikakauma paunai, ta'abi. ¹⁴Ai ta'ioibina Tirama, eka Obiapaka Iesu 'ari ai ebamikirina hauna, kehore ai abomo Iesu kipokia kebamikiri haeamonamai, ba wai mai ai kipokia keaoainaka ia herenai kahakoroti. ¹⁵Taba neiakia ikoikia hanona wai emi namo paunai tababainakia, weiana Tirama ena aoko'o hoana maearima bo'ona bo'ona ketabu ahinakia, ba namo 'abikia bo'ona Tirama katebena, atana katea'i taeana.

A'ikakauma Taearanai Nahamauri.

¹⁶Ua buonai aomai a'i nira'ora'o. Hauanimaiai hanona ni'abe'abe, iamo aomai hanona rani ha ha nimaha maha. ¹⁷Hau haiara papana neiana bariu rani papana tahoaina hauna kehore nuabi rarina 'akina mai banaibanaina hauna kemaiaina, nuabi weiana hanona eapa'ua ki'a baha ba hau haiara neiana. ¹⁸Ua buonai mahaka hanona taba nahaihanakia haukia herekiaiai a'i kemiaho ia a'i naha ihanakia tabakia haukia kahaiha, pokina nahaihanakia tabakia hanona a'i katemiaho homa'a ia a'i nahaihanakia tabakia hanona katemiaho banaibanai.

5 ¹Hauanika hanona itu 'abana, aika ha'ioibina eka itu neia hanopakai nahamiaho aina hauna katekaina kupa ai itu ha Tirama kehore kebenaka, weiana hanona maearima imakiaiai a'i tebabaina ia Tirama kipona ebabaina ituna kemiaho banaibanai. ²Aika bariu huanika ituna neianai nahamiaho aina naha'arara 'arara, eka nuatae apa'uana hanona eka itu kupai hauna weiana mauri huanina pahabatotona habuni 'abana. ³Aika habuni weiakia kahaba totonakia raninai, mai hauka a'i katetabu ahinaka. ⁴Hanopaka ituna huanika neianai nahamiaho oho aonai nahapuma hoai naha'arara 'arara hanona hanopakai huanika habunina pahabakuri ahina paunai aha'i, ia mauri huanina habunina kupai hauna pahabatotona paunai, weiana mauri huanina kehore 'ari huanina 'ekana kea'ina mauri banaibanai huaninai keao. ⁵Tirama hanona aka

neiana aika 'eukai eba'oruna, ia ehore Auba Robe ebenaka aka neiana wairai kerama hauna ibatohana.

⁶Ua buonai aika rani ikoinai aoka nitabura. Aika ha'jobina hauanika neianai nahamiaho aonai Obiapaka nemiaho 'ekana herekai hanona atatu'ai. ⁷Aika hanona a'ikakauma taearanai nahamauri, ia taba nahaiha paukai aha'i. ⁸Aika aoka nitabura abomo eka nuatae tohana hauanika ituna neiana kahahabona kahaeao Obiapaka kipokia kahamiaho. ⁹Hauanika ituna neianai kahamiaho 'ao kahahabona, 'abi na aha'i, eka nuatae apa'uana tohana hanona Obiapaka aona kahabaonamona. ¹⁰Pokina aika ikoikai Keriso ena bakai apa'uana wairanai kahakoroti kebabakainaka, ha ha namo 'ao ki'a hauani maurinai hababai ihobonai 'arana kaha'ina.

Baibua Akana Kahababaina.

¹¹Ai ta'jobina Obiapaka aea kahata'uai aihona paunai maearima tabahi ahinakia. Tirama e'jobi harainamai, ba au nabuabenimi wai abomo aomi tohanai ua pato'jobi aihonamai. ¹²Ai hanona heremiai kipomai ibanamomai a'i tahina muena, ia ai hanona wai bero namona tabenimi katoapainamai, ba weiakia maearima ihaihana mo tiapaina ia aokia a'i tiraona harai haukia ekia 'abi katobamuena. ¹³Emai babai mai emai 'abi'abi matoha po'o haukia 'abana raninai weiana hanona Tirama atana paunai, ia ai taotipa raninai weiana hanona wai paumiai. ¹⁴Weiana hanona Keriso ena raona'au ehore ai ebahi ahinamai. Ai ta'jobi haraina hau hamona aika ikoikai paukai e'ari, weiana anina aika ikoikai ia kipokia ha'ari. ¹⁵Keriso maearima ikoikai paukai e'ari weiana hanona bariu temiaho haukia ia kipokia ekia miahoai a'i katemaui, 'a Keriso ia paukai e'ari haeamona emikiri hauna paunai katemaui.

¹⁶Ua buonai bariu rani neianai niaoaina ai hau ha hanopaka ena raonaraona taearanai a'i kata'uahina, 'uainai Keriso hanona ua ta'uahi aihona ia bariu hanona ua homana a'i taraonana. ¹⁷Hau ha Keriso aonai nemiaho raninai, ia hanona aba maearima mahamahana, mauri 'ai'aina aba ekapare ia aba maearima mahamahanai eao. ¹⁸Taba neiakia ikoinai hanona Tirama ebabainakia. Tirama ehore ia mai aika baiataka ebabaibuana Keriso paunai, ba baibua akana ebenaka maearima kahamai ainakia ia ena hauai kateao. ¹⁹Tirama ehore Keriso aonai ia mai hanopaka maearimakia baiatakia ebabaibuana, maearima ekia ki'a a'i etuabinakia. Ba baibua 'abina neiana ebenamai katahinana. ²⁰Ua buonai ai hanona Keriso pinanai taeao, Tirama hanona ai pinamaiai nehina benimi. Ai Keriso atanai wai tahina benimi. Wai Tirama kipokia katobaibua. ²¹Keriso hanona ki'a hauna aha'i, 'a aika paukai Tirama ehore ki'a haunai^b ebaona, weiana aika hanona Keriso aonai bero haukia kahaeao Tirama wairanai.

^b 5.21 'ao ki'a ia'i obo tabanai

Tirama Ena Aka Haukia Hanona Atetua Aokiai Katebapahihi.

6 ¹Ai Tirama kipokia taka haeamo haumai ṭabahi ahinimi, Tirama ena aoko'o hoana toa'ina hauna a'i katobaki'ana. ²Pokina Tirama e'abi etibaha,

“E'u nuatae ranina tohanai
aiami aona,
abomo bamauri beraurana tohanai
abarainimi.”

Isa 49.8

Au wai nahina benimi Tirama ena nuatae ranina weiana hanona bariu, bamauri beraurana weiana abomo bariu.

³Hau ha aona a'i tamabakai'au kai'auna, weiana maearima emai aka beho a'i katetabu ahina paunai. ⁴Ia wairakiai ai kipomai tabatohanamai ai Tirama ena aka haumai taeara haeai haeai ikoikiai aokiai, weiakia ao aro'ari, hau haiara, mai atetua aokiai tabapahihi, ⁵te'atinamai, teba wapuranamai abomo to'ukiai tehari abunamai, taka 'ari, a'i taparua harai abomo mare'a ta'ari, ⁶emai robeai, aotipai, bapahihi ai abomo hoahoa namokiai, Auba Robe taburanai mai maearima iraona'auaikiai maearima tabaihanakia ai Tirama ena ta'ara'i haumai. ⁷'Abi tohana tahina karahina, mai Tirama ena hiabuai taka. Bero akakia hanona emai huari tabakia imamai abira abirai ta'inakia.

⁸Baika atamai tea'i taeana baika atamai tea'i ki'ana, tebapo'onamai abomo temariki ainamai, iamo ai Tirama ena aka haumaiai taeao. Maearima bai'oi haumaiai tibaonamai, iamo ai hanona 'abi tohana ṭahinana. ⁹Maearima a'i te'iobinamai, ia Tirama ne'iobinamai. Maearima tiraonana aba ṭa'ari, ia maurimaiai ṭamiaho. Puma rarina tibahoainamai, ia a'i ta'ari baihana. ¹⁰Aomai tibahaihaina ia rani ikoinai ṭaonamo. Ururu haumai 'abana ia maearima bo'okia ṭabaobianakia. Heremai taba aha'i moioina, 'a taba ikoikiai hanona ai 'eumaiai ṭemiaho.

¹¹Emai hau Korinto ai haumi e, taba ikoikiai wairamiai tahina pounakia, aomai ikoinai heremiai tabawaira tinana. ¹²Ai hanona wai ṭaoko'o ainimi ia wai hanona ai a'i tuaoko'o ainamai. ¹³Au wai nahina benimi matoha naha'u 'abana, ai ṭababai heremiai ihobona pato babaina heremaiai, aomi ikoinai heremaiai katobawaira tinana.

Aika Hanona Mauri Tiramana Ena Marea Robena.

¹⁴A'i tia'ikakauma haukia kipokia a'i katobahaeamo. Bero mai ki'a aea katebahamomo aiho? Ea mai wapura hanona a'i katemiaho hamomo. ¹⁵Keriso mai Tiaporo aokia aea katebahamomo aiho? A'ikakauma hauna mai a'i nia'ikakauma hauna ohi ekia raona hanona hamonai a'i kemiaho. ¹⁶Tirama ena marea robe mai kaiba'uku terarua hanona aea katebahamomo aiho? Aika hanona mauri Tiramana ena marea robena. Tirama kipona na e'abi aiho,

“Au hanona ia kipokia katamiaho
oioi, abomo a'i kahabonakia.
Au hanona ia ekia Tiramai kaeao,
ia hanona au e'u maearimai kateao.”

Lev 26.12

¹⁷Ua buonai Tiramai e'abi etibaha,
“Wai hanona ia tomohabonakia
herekiai tomokapare.
Opu akakia a'i katobabai.
Ba au wai ka'i taeanimi.

Isa 52.11; Esk 20.34, 41

¹⁸Au hanona wai Hamamiai kaeao,
wai hanona au naha'u haukia
mai babi'ekia ai katoao.
Tabura ikoinai Obiapakana,
e'u 'abi neiana.”

2Sam 7.14

7 ¹Ua buonai, e'u raona'au haumi ikoimiai e, 'abi'uai neiana herekai
ebabaina paunai, hauanika mai aubaka tibaopunakia tabakia
ikoikiai herekiai kahakapare eka mauri kahabamaha mahanakia, 'a
Tirama kahamariki aina eka mauri maikoina ia kahabena kaharobe.

Paulo Ena Aonamo Korinto A'ikakauma Haukia Paukiai.

²'Ekamai katohorena aomiai. Ai hau ha herenai beho a'i tababaina,
hau ha ena a'ikakauma a'i ta'i ki'ana, abomo hau ha a'i ta'oina ena taba
a'i ta'i. ³'Abi neiana nahinana hanona puma kabenimi paunai aha'i. Ia
'uainai ahina benimi 'abana, ai katamauri 'ao kata'ari re'a wai hanona
rani ikoinai aomaiai katomiaho. ⁴Au hanona wai na'i taeanimi mai napai
ki'a bahanimi, ua buonai emai hauhaiara aokiai ao'u nitabura abomo
naonamo ki'a baha.

⁵Ai Makedonia ai takara'au raninai abomo a'i tarai 'apua, atetua
haeai haeai aokiai tamiaho, baikia kipokia tabaiara, aomai mai ta'umai
tamiaho. ⁶'A ao 'abe'abe haukia aokia niba taburanakia Tiramana ehore
Tito euhuna heremaiai ba aomai eba taburanakia. ⁷Weiana ena mai mo
aha'i, ia wai aona aea tobatapura aihona pouna taona hanona aomai
etapura, abomo tonuatae katoihana'u, here'uai tobabai ki'a haunai
turaona kabe mai emi aka tabura au pau'uai hauna pouna ehina benamai
hanona e'u aonamo eapa'ua ki'a baha.

⁸E'u marere weiana atiu ahina heremiai hauna aomi ebaro'arina re'a,
bariu au weiana a'i na'arara aina. 'Uainai, rani papana a'arara aina
pokina araonana marere weiana aomi ebaro'arina. ⁹Ia bariu hanona
ao'u ninamo. Weiana aomi tearo'ari paunai aha'i, ia emi ao aro'ari ehore
ebaraona kabenimi paunai naonamo. Wai aomi tearo'ari hanona Tirama
ena nuataeai erama, ua buonai ai paumaiai ki'a ha a'i totabu ahina. ¹⁰Ao
aro'ari weiana Tirama ena nuataeai nirama hauna hanona maearima

aona nibahaeaina nibaraona kabena bamauri ketabu ahina, weiana hauna a'i kaha'arara aina. Ia ao aro'ari hanopaka ena nuatae paunai nirama hauna hanona 'ari kebaramana. ¹¹Ao aro'ari neiana Tirama ena nuataeai erama hauna paunai heremiai ebaramanakia tabakia katoraona harainakia. Toaka harai, emi beho aha'i hauna tobatoha haraina, beho topuere aina, Tirama tota'u aina, raona'au nuataenai toaka, beho tobaberonakia. Wai 'eka ikoikiai emi beho aha'i hauna tobawaira tinana.

¹²Au arere benimi hanona beho eabaina hauna 'ao herenai beho erama hauna paunai aha'i, 'a Tirama wairanai wai aea turaona'auai ki'a bahanamai hauna kewaira tina paunai arere benimi. ¹³Weiana ehore aomai eatabura haraina.

Weiana mo aha'i, Tito ena aonamo paunai aomai abomo enamo ki'a baha pokina wai tobaraina aona toba namona paunai. ¹⁴'Uainai au Tito wairanai apainimi, ba wai au a'i tobahaumaeana'u. Tahina benimi tabakia ikoikiai hanona 'abi tohakia, ihobonai mo tobatohana ai Tito wairanai tapainimi hauna hanona 'abi tohana. ¹⁵Tito ena raona'au heremiai hauna niapa'ua ki'a baha, pokina ia niraona 'inina wai ikoimiai aiana toka'aina abomo toa'i taeana mai ta'umi mai marikimi. ¹⁶E'u aonamo eapa'ua pokina a'iohi harai ki'a bahanimi wai emi hoahoa tenamo.

Makedonia A'ikakauma Haukia Mai Aonamokia Beruberu Tebaibeni.

8 ¹Uaho'abamai e, ai taba'iohinimi Tirama hanona ena aoko'o hoana ia ena marea maearimakia Makedoniai haukia ebenakia. ²Ia hau haiara rarina aonai temiaho abomo teuraru ki'a baha, iamo mai aonamokia beruberu bo'ona tebaibeni. ³Au wai heremiai ia nabatohanakia, taba herekiai hauna bo'ona tebaibeniaina, abomo kipokia ekia nuataeai tebaibeni banaina. ⁴Ia rani bo'ona tenoinamai, ia abokiamo Tirama ena maearima Ierusalemiai haukia ibaraikia akana katebabaina. ⁵Ekia baibeni weiana hanona eapa'ua ki'a baha ba ai taraonana hauna. Kori'uaina hanona kipokia tebaibeni ainakia Obiapaka 'eunai kateao, haeamona Tirama ena nuataeai kipokia tebaibeni ainakia ai 'eumaiiai kateao.

⁶Weiana buonai Tito tanoina, ia aba beruberu akana neiana baiatamiai ea'i ramana paunai, kebarainimi keaomo aka neiana katobaorena. ⁷Taba ikoikiai hana tubabai harainakia, emi a'ikakaumai, emi 'abiai, emi 'ioibiai, emi nuataeai, abomo emi raona'au heremaiiai haunai. Ua buonai ai tanuatae beruberu akana neiana abomo katobabai haraina.

⁸Au rauhuhu ha'i nahorotina. Ia e'u nuatae hanona baikia ekia baraibarai aea homana hauna kabawaira tinana heremiai ba ka'ioibina wai emi raona'au hanona tohana. ⁹Wai aba to'ioibina eka Obiapaka Iesu Keriso ena aoko'o hoana aea eapa'ua aiho. Ia hanona obia hauna, ia wai paumiai uraru haunai eao, pokina ena uraruai wai kebaobianimi.

¹⁰Au e'lu raona baraibarai akana neiana herenai hana nahomana, wai taba ihau murikai toa'i ramana hauna patobaorena hana mai emi namo. Aka neiana hanona wai toa'i rama 'uaina abomo tobabaina mai aomi ikoinei. ¹¹Ua buonai bariu aka neiana katobabaina keaomo katobaorena. Ia'iramana tonuatae aina paunai heremiai temiaho tabakia katoba orena. ¹²Wai katobaibeni mai nuataemi raninai, Tirama kehore wai heremiai temiaho tabakia katobena haukia kea'i taeanakia, 'a taba heremiai aha'i hauna robana a'i keahuna.

¹³Wai heremiai kepuma ba baika herekiai ke'ama'ama, weiana hanona e'lu nuatae aha'i. Ia nanuatae ha ha ikoikai kahaihobo. ¹⁴Bariu rani neianai heremi taba tebo'o haumi tekapu haukia katobarainakia, ba wai emi kapu raninai ia ekia taba katebo'o aonai wai katebarainimi. Weiana ikoikiai baraibarai ihobona kaha'ina. ¹⁵Puka robenai aba ererena 'abana, "Bo'ona ebararo hauna 'euna a'i ebo'o ki'a baha, bita mo ebararo hauna 'euna a'i ebita 'aki."

Paulo Aka Haukia Tito Mai 'Abana Ohi Euhunakia Teao Korinto.

¹⁶Tirama namo 'abina nabena, pokina emai nuatae katarainimi hauna ihobonai Tito abomo nenuatae. ¹⁷Emai noi ia kewahi heremiai hauna ea'i taena. Weiana emai noi paunai mo aha'i, ia kipona enuatae ki'a baha kewahi heremi. ¹⁸Uaho'abaka ha tauhuna Tito ohi tiwahi, ia hanona pou namona neiroro aina paunai Tirama ena marea maearima ikoikiai tibanamona hauna. ¹⁹Weiana mo aha'i, ia hanona Tirama ena marea haukia tehore tea'i taena ai ke'abanamai kebarainamai, kipokia eka raona'au baibeni monina neiana kataeaoaina Ierusalem. Weiana hanona eka nuatae baraibarai akana kewaira tina Obiapaka ena nuabi paunai. ²⁰Ai ta'ima harainamai pokina ai raona'au baibeni monina rarina neiana kata'imana aonai hau ha beho ha a'i metabu ahina a'i me'abi ki'a paunai. ²¹Ai tanuatae aka namona mai berona katababaina Obiapaka mo wairanai aha'i ia maearima wairakiai abomo.

²²Ba uaho'abaka haeai ha abomo tauhuna kipokia tiwahi, rani bo'okia tahobona ba taihana ia hanona ena nuataeai ebaraibarai. Bariu ia aba e'iobi harainimi aonai nenuatae ki'a baha kebaraibarai.

²³Tito hanona au 'aba'u taka haeamo wai ibaraimi. Mai uaho'abaka weiakia ia kipokia tiwahi haukia hanona Tirama ena marea haukia tea'i taeanakia haukia Keriso ena nuabi katebawaira tinana paunai. ²⁴Ua buonai emi raona'au hoana katoba ihanakia, weiana Tirama ena marea haukia ikoikiai katebatohana abomo kate'jobina wai tapainimi hanona ebero.

Baibeni Akana Katobabaina Tirama Ena Maearima Ibaraikia.

9 ¹Tirama ena marea maearima robekia Iudeai haukia ibaraikia akana pouna karere benimi hanona a'i nanuatae. ²Pokina au

a'jobina wai tonuatae katobaraibarai, ba a'ikakauma haukia Makedoniai haukia wairakiai apainimi, a'abi atibaha, “Akaia haukia hanona aba ihau murikai teba'oru katebaibeni.” Emi baibeni taburana weiana ehore ebahi ahinakia katebaibeni. ³Bari uaho'abaka neiakia nauhunakia tiwahi ena poki hanona emai apa wai ahamiai hauna anina a'i meaha'i paunai. 'A au ahina benimi ihobonai wai emi baibeni tabana hanona katoba'oruna. ⁴Weiana Makedonia haukia baika kipokia patawahi ba pateihanimi a'i toba'oru raninai, wai patohaumaea mo aha'i, tapainimi hauna paunai ai patahaumaea ki'a. ⁵Ua buonai au araonana kenamo uaho'abaka neiakia kanoinakia kate'uai katewahi heremi emi beruberu tabana to'uahi 'uaina hauna katoba'oruna. Weiana ai katakara'au aonai baraibarai tabana hanona aba e'oru, weiana kehore kebawaira tinana wai tobaibeni hanona mai aomi ikoinai, ia bahi ahi paunai aha'i.

⁶Katoraona haraina, ube bita 'aki kebatonakia hauna aniani bita 'aki mo keu'aunakia, 'a ube bo'ona kebato hauna aniani bo'ona keu'aunakia. ⁷Wai ha ha kipomi emi nuatae ihobonai katobaibeni, ia mai 'arara 'ararami 'ao bahiahi paunai a'i katobaibeni. Pokina Tirama hanona maearima aona namonai nibaibeni hauna niraona'au aina. ⁸Tirama hanona herenai etaina ena aoko'o hoana kebenimi hanona kebeni banainimi, ba rani ikoinai taba namokia heremiai kebo'o, weianai wai emi baraibarai akakia namokia bo'ona katobabainakia. ⁹Puka robenai tererena 'abana etibaha,

“Ia nihore taba namokia bo'okia
uraru haukia nibenakia aona
mai beruberunai,
ena aka bero hanona kemiaho
banaibanai.”

Sal 112.9

¹⁰Tirama weiana nihore biraura hauna ube nibena mai aniani nibena hauna kehore ube bo'ona kebenimi katobato, keba'omunakia, emi aka namokia buabuakia bo'okia kebaramanakia. ¹¹Ia wai heremiai taba ikoikiai kebabo'onakia ba katobaibeni rani ikoinai. Weiana emi beruberu tabakia kataeaoainakia herekiai hanona maearima bo'ona namo 'abina katehinana Tirama herenai. ¹²Baibeni akana neiana tubabaina hanona Tirama ena maearima robekia ibaraikia akana mo a'i nibabaina, 'a aka neiana kehore maearima bo'ona abomo namo 'abina Tirama katebena. ¹³Emi baibeni akana neiana nihore Keriso ena pou namona tohina pouna mai akana tubabaina hauna nibatohana, abomo emi beruberu akana ia herekiai mai maearima ikoikiai herekiai hauna nibatohana, weiana paunai maearima Tirama katebanamona. ¹⁴Kate bahuba'ari wai ahamiai raninai, kateraona ki'a bahanimi pokina Tirama ena aoko'o hoana apa'uana wai heremiai paunai. ¹⁵Namo 'abina Tirama kahabena ena beruberu apa'uana herekai hauna paunai, beruberu weiana pouna 'abiai kahahina hina haraina hanona a'i ketaina.

Paulo Ena Aka Neuhoreaina.

10 ¹Maearima baikā ti'abi au wai heremiai namiaho hanona na'amari'amari, 'a naeao atau'ai hanona natabura. Au Paulo kipo'u nahore Keriso ena ao 'amari'amari mai ena rabo harai ai nanoinimi, ²weiakia te'uahinamai ti'abi hanopaka ena taearai tamauri na tihoma haukia herekiai ka'abi pahihī, ia au wai nanoinimi emi babaiai katobero, kawahi heremiai raninai a'i pa'abi pahihī. ³Hanopaka neiana aonai nahamiaho iamo aika hanona hanopaka haukia tehuari taearanai a'i nahahuari. ⁴Eka huari tabakia hanona hanopaka ena huari tabakia 'abakia aha'i, ia Tirama ena huari tabakia taburakia. Weiakia tiaporo ekia miaho 'ekakia pahihikia abomo kateahu 'iti'itinakia. ⁵Aika maearima ekia raonaraona bai'oikia mai apa tabakia weiakia Tirama i'ioibina taearana tikaiabuna haukia nahahu 'iti'itinakia, maearima aokia maikoinai nahaeoainakia Keriso aiana kateka'aina. ⁶Wai ikoimiai Keriso aiana aba tuka'ai ore haraina aonai, ai kataba'oru weiakia aiana a'i tika'aina haukia puma katabahoa ainakia.

⁷Wai hanona taba kapekia mo toihanakia. Hau ha niraonana ia Keriso ena maearima raninai, ia kipona keraona harai 'uaina, pokina ai abomo Keriso ena maearima ia 'abana. ⁸Obiapaka hiabu ebenamai hanona emi mauri kataba taburanakia, ia a'i kata'i ki'anakia, ua buonai hiabu weiana napai ki'a bahana re'a, weiana a'i nahaumaea aina. ⁹Au a'i nanuatae wai katoraonana kabata'unimi buonai marere neiakia narerenakia. ¹⁰Hau baikā te'abi tetibaha, "Paulo ena marere 'abikia hanona tepuma abomo tetabura, 'a ia kipona tohana nimai herekai hanona ia e'abe'abe ena 'abi abomo te'amari 'amari taba aha'i." ¹¹Maearima na ti'abi aiho haukia kate'ioibi haraina, marere aokiai taba tarerenakia haukia mai ai tohamai katawahi heremiai taba kata babainakia haukia hanona ihobomo a'i tehaeai.

¹²Ai a'i tanuatae maearima weiakia kipokia tiba apa'uanakia haukia kipokia a'i kataba ihobonamai. Ia hanona ekia aotipa aha'i. Ia kipokia baiatakiai ekia babaiai kipokia tibaihobo aina. ¹³Ia ai emai apa hanona a'i kekabanai ki'a baha, ia Tirama aka ebenamai katababaina hauna 'ekana aonai mo kemiaho, wai abomo aka weiana aonai totabura. ¹⁴Ai emai apa hanona a'i eao ki'a baha, Keriso ena pou namona tawahiai 'uaina heremiai paunai, emai apa 'ekana a'i takahaboaina. ¹⁵Ua buonai Tirama emai aka 'ekana e'uahina hauna abihanai maearima baikā aka ihobona tibabaina hauna a'i tapaina. 'A ai emai buabeni hanona wai emi a'ikakauma keapa'ua ba ai emai aka Tirama e'uahina heremiai hauna abomo keapa'ua. ¹⁶Weiana paunai ai hanona pou namona katairoro aina hanopaka baikā weia wai abihamiai maearimakia weiakia tai ha a'i eiroro 'apua 'ekakia haukia herekiai. Pokina hau ha ena aka 'ekana ai aba tebabaina hauna a'i katapaina.

¹⁷Puka robenai tererena 'abana,
 “Tai nenuatae keapa hanona
 Obiapaka taba ebabaina hauna
 meapaina.”

Ier 9.24

¹⁸Pokina maearima ha kipona namona nehinana hauna Obiapaka ia a'i nia'i taeana, ia Obiapaka kipona nihore maearima nibatohana enamo hauna nia'i taeana.

Paulo Mai Iuhubeau Haukia Bai'oikia.

11 ¹Au nanuatae hanona katoiha haona'u, napo'o 'apua re'a, ia tomoiha haona'u. ²Au hanona wai nauhore ainimi, matoha Tirama neuhore ainimi 'abana. Wai hanona uaho rari namona 'abana, a'abi'uai ainimi hau hamona katoatawana, weiana hanona Keriso. ³Ia au ao'u niaro'ari, pokina 'erau ehore Eba e'oina ebahureana ihobonai wai abomimo raona ki'a obokia katehore aomi katebahureanakia Keriso ikutiaina taearana tohana a'i tomohabona. ⁴Pokina hau ha nimai Iesu ai tairoro aina hauna aha'i ia Iesu haeai ha neiroro aina hauna a'i tukaiabuna ia tua'i taeana mai aonamomi, abomo Auba Robe mai pou namona heremaiai to'o haukia a'i tua'i taeanakia ia auba haeai mai pou haeaimo neiroro ainakia haukia tua'i taeanakia.

⁵Au naraonana iuhubeau haukia apa'uakia na tiho haukia tiwahi heremi hanona a'i tenamo ki'a baha ba au. ⁶Iamo taina, pa'e 'abi'abiai hanona a'i etaina'u, ia aotipai hanona etaina'u, neiana hanona rani ikoikiai mai taeara ikoikiai aokiai tabawaira tina haraina heremiai.

⁷Tirama ena pou namona heremiai airoro aina hanona 'ara'u a'i atabuna, hoa weianai kipo'u aba'aera 'aerana'u wai ka'i taeanimi paunai. Ba weiana hanona ababai ki'a, 'u? ⁸Au wai baiatamiai aka aonai, Tirama ena marea haukia baika aiara haeai haukia tebaraina'u, au hanona herekiai moni a'i 'abaeana, weianai wai kabarinimi paunai. ⁹Au heremiai amiaho aonai moniai patobaraina'u paunai a'i abaro'arinimi, uaho'abaka Makedoniai temai hanona taba anuataeai haukia ikoikiai tebena'u. Rani 'uainai ihobona mai rani wairakai, abomo au hanona aro'ari a'i kabeni 'apuanimi. ¹⁰Keriso ena 'abi tohana ao'uai nemiaho haunai, na'abi au e'u apa neiana hauna Akaia hanona maikoina aonai hau ha a'i keba'orona. ¹¹A'i naraona'au ainimi paunai na na'abi aiho, 'u? Aha'i. Tirama e'ioibina naraona'au ainimi.

¹²Au bariu 'ara a'i natabuna hauna kababai to'ona weiana iuhubeau haukia na tiho haukia baika ekia apa 'abina tehinana tetibaha, “Ia hanona aika kipokia taeara hamonai nahaka,” hauna kaba'orona paunai. ¹³Pokina hau weiakia hanona iuhubeau haukia tohakia aha'i, ia hanona iuhubeau haukia bai'oikia, ekia akai hanona tibat'oi, abomo ihakia tibahaeainakia matoha Keriso ena iuhubeau haukia 'abana. ¹⁴A'i

kahamaharea, pokina Satani abomo kipona ihana ebahaeaina matoha ea aneruna 'abana. ¹⁵Ua buonai ena iuhubeau haukia ihakia kateba haeaina matoha bero akana tibabaina haukia 'abana hanona herekiai a'i epahihi. Muriai hanona ekia babai ki'a obokia ihobokiai 'arakia katea'i.

Paulo Ena Hauhaiara Iuhubeau Akana Aonai.

¹⁶Na'abi mue mo, hau ha a'i meraonana au hana po'o hau'u. Ia ua turaona aihona'u raninai, tomoa'i taeana'u matoha po'o hau'u 'abana ba au papana kapa 'apua. ¹⁷Au taba na'uahina hauna Obiapaka herenai a'i emai, apa 'abi'abinai na'abi hanona matoha po'o hauna ha 'abana. ¹⁸Ia maearima bo'ona hanona hanopakai taba taba tebabai haukia tiapainakia, ba au abomo uamo kahoma.

¹⁹Wai kipomi turaonana toaobero ki'a baha, ua buonai po'o haukia hanona tua'i taeana. ²⁰Wai hau ha neuhuaou uhuaonimi, ni'oi'oinimi, 'ao nibapo'o po'onimi, heremiai nibaro'e, 'ao wairami nibo'anakia hanona tua'i taeana. ²¹Au hanona ua a'i nababai aiho. Wai turaonana au na'abe'abe paunai ua a'i nababaina, 'ao ua a'i nababaina hauna kahaumaean, 'u?

Ia hau ha taba ha keapaina raninai, (au na'abi matoha po'o hauna 'abana) au abomo kapa ia 'abana. ²²Ia Heberu haukia, au abomo Heberu hau'u. Ia Isaraela haukia, au abomo Isaraela hau'u. Ia Aberahamo 'aba'abana, au abomo Aberahamo 'aba'abana. ²³Ia Keriso ena ta'ara'i haukia, u? (Au na'abi'abi matoha beau'ari hauna ha,) ia au hanona ta'ara'i hau'u namo'u ba ia. Au hanona aka tabura ki'a baha, rani bo'okia awapura, te'ati ki'a bahana'u, abomo rani bo'okia hereka 'akinai mo pateba'arina'u. ²⁴Rani ima Iuda haukia i'ati pumakia ikoinai harau aihau 'ababani hamomo (39) tebena'u. ²⁵Rani aihau Roma haukia matiuai te'atina'u, abomo rani hamona piharai teahuna'u. Rani baihau ahi aehe'au haukia teuhu, ba baiatakiai ha hanona wapu hamona maikoina 'aku aonai abure. ²⁶E'u kaoao bo'okia aokiai au hanona ki'a bo'okia 'eka neiakiai atabu ahi, tou atekia herekiai, bainao haukia herekiai, kipo'u e'u rama haukia mai rama haeai haukia herekiai, ki'a baika hanona aiara apa'uakia aokiai, hano'akukiai mai 'akupakai atabu ahi, haeamona tihatia'a bai'oina'u haukia herekiai ki'a atabu ahi. ²⁷Au hanona aka mai aro'ari, rani bo'okia a'i aparua, mare'a a'ari abomo 'ako'u e'ororo, rani bo'ona aniani here'u eaha'i, e'u parua 'ekana eaha'i abomo habuni'u eaha'i. ²⁸Weiakia mo ikupaikiai aha'i, ia rani bo'ona Tirama ena marea haukia 'eka haeai haeai temiaho haukia i'imakia paunai ao'u niaro'ari. ²⁹Hau ha ni'abe'abe raninai au abomo na'abe'abe, hau ha ki'a aonai tibakatotona raninai au ao'u nihaiara.

³⁰Au kapa raninai, taba weiakia au e'u 'abe'abe tibawaira tinana haukia kapainakia. ³¹Tirama e'iohina au a'i nabai'oi. Ia hanona Tirama

eka Obiapaka Iesu Keriso Hamana, Ia atana kahabanamona banaibanai. ³²Au Damaseko ai amiaho raninai obia 'arana atana Areta ena Kabana hauna ehore 'ima haukia aiara apa'uana pa'abina 'akonai ehorotinakia katebirina'u. ³³Ia uaho'abaka baika tehore areha ha aonai teutana'u pihia 'ererenai tebaririna'u, ia herenai abeau 'akaumana.

Paulo Ena Mahabanai.

12 ¹Apa hana taba namona ha a'i nibaramana, ia au hanona napa mo. Bariu Obiapaka taba baika mahabanaia mai ibawaira tina taearanai ebaihana'u haukia robakia kahunakia. ²Ihau harau haea bani teao aonai au Keriso ena maearima ha a'jobina hauna tea'i taeara teaoaina kupa ibaihauna hauna aonai. (Au a'i a'jobina, neiana hanona hauaninai eao 'ao aubanai eao, Tirama kipona mo e'jobina.) ³Na'abi mue mo, hau neiana hanona tea'i taeara teaoaina Paradiso aonai. (Au a'i a'jobina, neiana hanona hauaninai eao 'ao aubanai eao, Tirama kiponamo e'jobina.) ⁴Abomo weia 'abi baika maearima pinakiai patehina a'i petainakia, mai taba weiakia poukia maearima a'i katehina haukia aiakia eo'o. ⁵Au hau neiana hauna kapaina, ia au kipo'u a'i kapaina'u, haeamona taba weiakia e'u 'abe'abe tibawaira tinana tabakia haukiamo kapainakia.

⁶Au panuatae papa raninai, au hanona po'oai a'i paeao pokina au hanona 'abi tohana pahinana. Ia a'i kapa, pokina au a'i nanuatae wai ha au taba ababai toihana'u mai ahina urukia to'o haukia paukiai a'i tomotibaha au hanona apa'ua ki'a baha.

Paulo Hauaninai Haiara Ha Emiaho A'i Keapa.

⁷Taba namoabukia aihanakia paukiai a'i mapa ki'a baha hanona Tirama hauani'uai haiara rarina ha ehorotina keba'orona'u, Satani hanona haiara neiana aonai niaka keba 'ehona'u abomo keba'orona'u a'i mapa. ⁸Rani aihau abahuba'ari Obiapaka anoina haiara neiana here'uai hauna kea'i obona. ⁹Ia Obiapaka ehina bena'u etibaha, "E'u aoko'o hoana ikupaiana mo kabenilo, pokina oi nu'abe'abe aonai e'u hiabu hanona niapa'ua ki'a baha." Ua buonai e'u 'abe'abe 'ekakiai napa hanona ao'u ninamo ki'a baha, pokina Keriso ena hiabuai ke'aeana'u paunai. ¹⁰Keriso paunai au na'abe'abe, 'abi ki'a obokia tehina here'uai, tibahau haiarana'u, ti'oatana'u abomo tibatetuana'u aokiai ao'u ninamo. Pokina au na'abe'abe aonai au hanona natabura toha.

Paulo Ena Aoaro'ari Korinto Haukia Herekiai.

¹¹Wai tobahi ahina'u paunai au nababai matoha po'o 'abana. Wai hanona pou'u namona patohinana haumi. Iamo taina e'u namo aha'i re'a, ia emi iuhubeau haukia apa'uakia na tiho haukia weiakia au a'i

tetara haona'u. ¹²Au baiatamiai amiaho aonai ao'u abapahihina, hoa haeai haeai mai bata'u ta'u huri akakia mai hiabu hoakia ababai haukia tehore tebatohana'u au hanona Keriso ena iuhubeau hau'u ha. ¹³Tirama ena marea haukia 'eka haeai haeaiiai temiaho haukia herekiai aka ababainakia haukia ihobokia mo wai heremiai ababai. Ia wai heremiai hanona 'ara'u a'i atabuna. Weiana hanona ababai ki'a raninai, e'u ki'a tomohina haona.

¹⁴Bariu nei ana hanona rani ibaihauna au aba'oru kabaki bakinimi, abomo au hanona a'i kabaro'arinimi. Pokina au hana wai mo nanuatae ainimi, ia emi kepu a'i nanuataeai. Haeamona miori hana hama hina ekia taba a'i kateba'oru, iamo hama hina haukia katehore miori ekia taba kateba'oru. ¹⁵Ua buonai au hanona mai aonamo'u e'u taba ikoikiai kabenimi mai au kipo'u abomo kabaibeni aina'u wai ibaraimi paunai. E'u raona'au niapa'ua heremiai hanona emi raona'au keko'iko'i here'uai, u? Aha'i, ua a'i kehoma.

¹⁶Wai ikoimiai to'iojina, weiana au hanona puma a'i abenimi, iamo hau baika ti'abi au hanona aba haoreanimi bai'oi ai abarewanimi. ¹⁷Aea a'oi aihonimi? Auhunakia haukia herekiai a'oinimi emi taba a'inakia, u? Aha'i, to'iojina au weiana a'i ababaina. ¹⁸Au Tito auhuna ewahi heremi aonai uaho'abaka ha abomo auhuna terarua tewahi, ba Tito e'oinimi emi taba ea'inakia, u? Aha'i, Tito mai au tararua hanona aomai hamonai taka abomo taeara hamonai taka'a.

¹⁹Wai pa'e turaonana rani ikoinai ai hanona kipomai emai bero taearana heremiai tatabuna, u? Aha'i. Tirama wairanai ai hanona Keriso ena aka haumai 'abi neiakia tahinanakia, abomo taba tababai haukia ikoikiai hanona wai emai hau ki'ami ibaraimi paunai. ²⁰Au hanona ao'u niaro'ari, pokina kawahi raninai, katabu ahinimi au naraonanimi ihobonai 'ao aha'i, wai abomo au katotabu ahina'u wai turaonana'u ihobonai 'ao aha'i. Au ao'u niaro'ari taba neiakia heremiai a'i matabu ahinakia paunai, baiara mai wamuru, opuere mai ani ki'a, 'abi ki'a mai uahiuahi, apa mai baripuripu. ²¹Au hanona ao'u niaro'ari, pokina kawahi mue raninai e'u Tirama kehore kebahaumaeana'u wairamiai, bo'okia 'uainai tebabai ki'a hoahoa 'opukiai, ekia nabau ki'ai mai ekia maha poreporeai a'i teraona kabe haukia paukiai kahai.

Paulo Ehina benakia A'ikakauma Aonai Katemiaho.

13 ¹Neiana hanona rani ibaihauna au kawahi heremi. Puka robenai tererena 'abana, "Beho ha hanona maha iha^c maearimakia rua 'ao aihau ekia 'abiai kahabatohana." ²Au e'u bakibaki ibaruana heremiai aonai 'uainai tobeho haumi abaraonanimi. 'A bariu atau'ai namiaho

^c 13.1 mahakiai teihana haukia

aonai harina maikoina haumi nabaraona muenimi. Au kawahi mue heremi hanona beho haumi ikoimiai puma katoa'ina. ³Wai tonuatae katobatohana Keriso hana au pina'uai ni'abi. Weiana to'ioibina Keriso hanona ena aka wai heremiai a'i ni'abe'abe, ia ena hiabu heremiai hanona nitabura. ⁴'Abi tohana Keriso hanona 'abe'abe paunai matiui ibiri ropo 'ubinau teahu 'arina, iamo bariu nimaui nemiaho Tirama ena hiabuai. 'Abi tohana Keriso ena mauri aonai ai abomo ta'abe'abe, ia emai baihatia'a heremiai hauna aonai Tirama ena hiabuai Keriso ena mauri aonai katamiahō katabarainimi.

⁵Kipomi emi mauri tomoiha harainakia, abomo kipomi tomo'ioi harainimi wai hanona a'ikakauma aonai tomiaho 'ao aha'i. Wai to'ioibina Keriso Iesu hanona emi mauri aonai nemiaho. Aha'i raninai wai hanona a'i tua'ikakaumai tohana. ⁶Au nanuatae wai kato'ioibina ai hanona Keriso ena iuhubeau haumai tohamai. ⁷Ai Tirama herenai tabahuba'ari wai beho ha a'i katobabaina paunai. Ai Keriso ena iuhubeau haumai 'ao iuhubeau haumai aha'i re'a weiana hauna aomi a'i kebaro'arina, ia emai nuatae apa'uana hanona wai aka berokia katobabai. ⁸Ai hanona 'abi tohana ia'iki'ana akana ha a'i katababaina, ia ibaraina akana mo katababaina. ⁹Ai ta'abe'abe iamo wai tutabura hanona aomai ninamo. Ba ai tabahuba'ari wai katobero 'aunimi. ¹⁰Weiana buonai atau'ai namiaho aonai 'abi neiakia narerenakia tiwahi heremi, weiana kawahi aonai Tirama hiabu ebena'u haunai a'i mahinabe pahihinimi. Hiabu neiana hauna emi a'ikakauma kebapa'uana ia a'i kea'i ki'ana.

'Abi Orena.

¹¹'Abi orenai, uaho'aba'u e, bariu hanona ikoimiai haparua. Katoaka tabura emi a'ikakaumai katobero 'aunimi. E'u noinoi 'abikia katoa'i taeanakia, ha ha aomi katehamomo abomo baibuai katomiaho. Ba raona'au mai baibua Tiramana hanona heremiai kemiaho.

¹²Tirama ena banamoai ha ha katobanamonimi.

¹³Tirama ena robe maearimakia ikoikiai ekia banamo 'abikia teuhunakia heremiai.